

Ceremonia protocolar dilanti di Bestuurskantoor tabata atractivo, elegante y imponente

ORAJESTAD – Riba diadomingo 18 di maart a tuma luga e acto protocolar enconexion cu nos celebracion nacional di Dia di Himno y Bandera. E acto aki a tuma luga den oranan di mainta dilanti di Bestuurskantoor. Comision Celebracion Dianan Nacional a organisa e acto protocolar aki cu a conta cu presencia di e autoridadnan maximo di nos pais; y cantidad di publico cu a bin celebra y presencia e programa protocolar y e desfile dilanti di Bestuurskantoor.

E programa tabata uno bon hinca den otro caminda sr. James van der Linden a fungi como maestro di ceremonia. Tabata algo masha yamativo ora cu e mandatarionan a cana for di Fort Zoutman pa Bestuurskantoor. Eynan

Su Excelencia Gobernador di Aruba, sr. Fredis Refunjol y su distinguido esposa a haci su yegada pa asina cuminsa oficialmente cu e ceremonia di entrada di e badera di Aruba na cargo di Arumil.

E hisamento di nos bandera a ser compaña pa Trommel cu Flauta; y e Himno di Aruba a ser interpreta pa muchanan di scol basico y Coro Tuti Fruti - "aubade". Prome parti di aubade na encargo di muchanan di scol basico y Coro Tuti Fruti, bou direccion di sra. Maybelline Arends-Croes, acompaña pa Orkesta Nacional Hubenil, bao encargo di Sr. Johnny Croes.

Despues a cuminsa sali e diferente grupo uniforma, algo masha imponente, ya cu nos ta papiando di un desfile mahestuoso di alrededor di 47 grupo uniforma. Igualmente Prome Ministro di Aruba, Sr. mr. Mike Eman a duna su discurso masha elocuente enconexion cu e balor historico di e fecha aki.

Durante e evento protocolario dilanti Bestuurskantoor riba nos dia nacional, a haci entrega di dos buki na



nos mandatario. Ta trata aki di e buki "Aruba 25 Status Aparte, Bibliografie van de Status Aparte van Aruba", compila dor di Irais Sankatsing-Nava. Otro buki tabata "25 aña na bo servicio", compila dor di Alice van Romondt, cu cooperacion di no menos di 41 departamento di Gobierno. Den e

buki aki ta conta e historia di nos servicionan di Gobierno desde cu Aruba a bira pais, na 1986. E toke folklorico tabata na encargo di baile tipico di grupo Super Dancers bao encargo di Francie Croes. E tabata un ceremonia protocolar masha atractivo, elegante y imponente. □

